

Na osnovu člana 13. stav (2) alineja 18. Zakona o principima lokalne samouprave u Federaciji Bosne i Hercegovine («Službene novine Federacije BiH», broj: 49/06 i 51/09), člana 70. stav 1. tačka 2. Statuta Općine Vogošća («Sl. novine Kantona Sarajevo», broj: 27/14, 14/15, 9/20 i 23/24), Općinsko vijeće Vogošća na sjednici održanoj 26.06.2025. godine, donijelo je

PRAVILNIK O KRITERIJIMA ZA DODJELU STIPENDIJA UČENICIMA I STUDENTIMA SA PODRUČJA OPĆINE VOGOŠĆA

I. OSNOVNE ODREDBE

Član 1. (Predmet)

Pravilnikom o kriterijima za dodjelu stipendija učenicima i studentima sa područja općine Vogošća (u daljem tekstu: Pravilnik) utvrđuju se opće odredbe, prava i uslovi za ostvarivanje općinske stipendije učenika i studenata, državljana Bosne i Hercegovine, koji se nalaze na redovnom školovanju u srednjim i visokoškolskim ustanovama, a imaju prebivalište na području općine Vogošća u neprekidnom trajanju od godinu dana do dana podnošenja prijave za dodjelu stipendije.

II PRAVO I USLOVI

Član 2. (Pravo na stipendiranje)

- (1) Pravo na stipendiju po ovom Pravilniku imaju učenici i studenti koji se redovno školuju, starosti do 25 godina, koji su u prethodnoj školskoj/akademskej godini postigli uspjeh u školi/fakultetu/akademiji i to:
- a) Učenici srednjih škola sa najmanjom prosječnom ocjenom od 4,50, a učenici prvog razreda srednje škole koji su u IX razredu stekli prosjek ocjena 5,00.
 - b) redovni studenti fakulteta/akademije koji prvi put upisuju tekuću studijsku godinu na nekoj od visokoškolskih ustanova sa najmanjom prosječnom ocjenom 8,00, a studenti prve godine fakulteta/akademije koji su u IV razredu srednje škole ostvarili prosjek ocjena od najmanje 4,50.
 - c) Učenici sa prosjekom ocjena 5,00 ostvarenih u I, II, III i IV razredu srednje škole, kao i studenti sa prosjekom ocjena 9,00 i više, ostvaruju pravo na dodjelu stipendije bez obzira na ukupan broj bodova prikupljen na osnovu drugih kriterija po ovom Pravilniku.
 - d) Pravo na stipendiju ostvarit će i djeca bez oba roditelja, djeca žrtve nasilja evidentiranih u MUP-u KS koji se nalaze na redovnom školovanju u srednjim školama i na visokoškolskim ustanovama, kao i učenici i studenti sa teškim oboljenjima utvrđenim na osnovu klasifikacione liste teških oboljenja, bez obzira na ukupan broj bodova prikupljen na osnovu kriterija definisanih ovim Pravilnikom.

Član 3. (Eliminatorni uslovi)

Pravo na stipendiju ne mogu ostvariti učenici i studenti koji:

- a) koriste stipendiju po drugom osnovu,
- b) su obnovili godinu,
- c) imaju status apsolventa.

Član 4.
(Plan stipendiranja)

- (1) Općinski načelnik, na prijedlog Službe nadležne za poslove obrazovanja (u daljem tekstu: Služba), donosi Plan stipendiranja učenika i studenata za tekuću školsku/akademsku godinu, a shodno potrebama i raspoloživim finansijskim sredstvima utvrđenim prijedlogom Budžeta za godinu za koju se Plan i donosi.
- (2) Ukoliko se iz određenog razloga ne prijavi dovoljan broj kandidata u skladu sa Planom iz stava (1) ovog člana, Općinski načelnik zadržava pravo da predviđena sredstva preusmjeri na ostale kandidate, kako bi se planirana sredstva iskoristila.
- (3) Plan provodi Općinski načelnik putem Službe, a isplata stipendija precizira se Ugovorom o stipendiranju.

Član 5.
(Iznos stipendije)

- (1) Stipendije se dodjeljuju za jednu školsku/akademsku godinu i isplaćuju se za devet (9) mjeseci, u kojima se nastava odvija.
- (2) Visina mjesečne stipendije za učenike iznosi 85,00 KM, odnosno 765,00 KM na godišnjem nivou.
- (3) Visina mjesečne stipendije za studente iznosi 135,00 KM, odnosno 1.215,00 KM na godišnjem nivou.

III IZBOR KANDIDATA

Član 6.
(Javni poziv)

- (1) Izbor kandidata za stipendiranje vrši se na osnovu kriterija iz čl. 9., 10. i 11. ovog Pravilnika, a putem prijave na javni poziv.
- (2) Javni poziv raspisuje Općinski načelnik na prijedlog Službe.
- (3) Javni poziv se objavljuje u dnevnim novinama i na web stranici Općine, a sadrži pravo i uslove koje kandidati moraju ispunjavati, rok za podnošenje prijave, potrebnu dokumentaciju, način podnošenja prigovora i druge potrebne podatke.

Član 7.
(Način izbora kandidata)

- (1) Pristigle prijave svih kandidata za stipendiranje obrađuje Služba i na osnovu obrađenog materijala donosi i objavljuje preliminarnu rang listu učenika i studenata.
- (2) Preliminarna rang lista objavljuje se na web stranici Općine Vogošća.
- (3) Na listu iz stava (1) ovog člana kandidati mogu u roku od osam (8) dana od dana objavljivanje iste, podnijeti pismeni prigovor Komisiji za razmatranje prigovora koju imenuje Općinski načelnik iz reda državnih službenika (u daljem tekstu: Komisija).
- (4) Odluku o prigovoru Komisija će donijeti u istom roku računajući od dana njegovog podnošenja.
- (5) Konačnu odluku o izboru učenika i studenata za stipendiranje donosi Općinski načelnik.
- (6) Sa izabranim kandidatima zaključuje se ugovor o dodjeli stipendije, kojim se regulišu međusobna prava i obaveze učenika/studenata i Općine Vogošća.
- (7) Ugovor potpisuje učenik/student i Općinski načelnik u ime Općine Vogošća, a za maloljetne učenike ugovor potpisuje roditelj/staratelj kandidata.

Član 8.
(Obustava stipendije)

- (1) Pravo Općinskog načelnika je da obustavi isplatu stipendije učeniku/studentu ukoliko:
 - a) Napusti redovno školovanje,
 - b) Izgubi pravo na dalje školovanje iz neopravdanih razloga,
 - c) Utvrdi se da prima stipendiju po istom osnovu,
 - d) Promjeni mjesto prebivališta.
- (2) U slučajevima predviđenim u stavu (1) ovog člana potpisnik ugovora o stipendiranju dužan je da vrati iznos sredstva ostvaren nakon gubitka prava na stipendiju, a najkasnije do kraja tekuće školske/akademske godine za koju je primio stipendiju po osnovu ovog ugovora.
- (3) Studentima koji nakon potpisivanja ugovora o stipendiranju, svoje školovanje nastave van granica BiH neće se obustaviti isplata stipendije.

IV KRITERIJI ZA DODJELU STIPENDIJA

Član 9.
(Kriteriji za dodjelu stipendije)

- (1) Osnovni kriterij za dodjelu stipendija je rezultat postignut u učenju u prethodnoj školskoj/akadamskoj godini.
- (2) Dodatni bodovi utvrđuju se na osnovu rezultata postignutih na takmičenjima prema kalendaru takmičenja nadležnog ministarstva (izuzev rezultata ostvarenih na takmičenjima iz sporta), kao i za status perspektivnog sportiste.

Član 10.
(Bodovanje osnovnog kriterija)

Bodovanje kandidata po osnovu rezultata u učenju vrši se na slijedeći način:

- a) Za učenike prvog razreda srednje škole prosječna ocjena u završnom razredu osnovne škole zaokružena na dvije decimale i pomnožena sa 9 (prosječna ocjena x 9),
- b) Za učenike viših razreda srednjih škola prosječna ocjena u prethodnoj školskoj godini zaokružena na dvije decimale i pomnožena sa 10 (prosječna ocjena x 10),
- c) Za studente na prvoj godini studija prosječna ocjena u IV razredu srednje škole zaokružena na dvije decimale i pomnožena sa 18 (prosječna ocjena x 18),
- d) Za studente viših godina fakulteta/akademija prosječna ocjena u prethodnoj godini studija zaokružena na dvije decimale i pomnožena sa 10 (prosječna ocjena x 10).

Član 11.
(Bodovanje dodatnih kriterija)

- (1) Dodatno bodovanje vrši se na osnovu slijedećih kriterija:

Nivo takmičenja	Bodovi za učešće	Osvojeno mjesto	Bodovi za osvojeno mjesto
Općinsko	1	1.	4
		2.	3
		3.	2
Kantonalno	2	1.	7
		2.	6
		3.	5
Federalno	3	1.	10
		2.	9
		3.	8

Državno	4	1.	13
		2.	12
		3.	11
Međunarodno	5	1.	16
		2.	15
		3.	14
Olimpijada	6	1.	20
		2.	19
		3.	18

- (2) U okviru kriterija iz stava (1) ovog člana, osvojeno mjesto isključuje bodove po osnovu učešća na takmičenju.
- (3) Za status perspektivnog sportiste kandidat ostvaruje 1 bod.
- (4) Kandidati koji istovremeno redovno pohađaju i muzičku školu – 1 bod.
- (5) Učenik/student čiji je roditelj poginuo kao pripadnik boračke populacija, čiji je roditelj pripadnik boračkih populacija po bilo kom osnovu (demobilisani borac, dobrovoljac i organizator otpora, veteran, učesnik rata, ratni vojni invalid) ostvaruje 2 boda.
- (6) Učenik/student čiji je roditelj civilna žrtva rata ili logoraš ostvaruje 1,50 bodova.
- (7) Prava definisana stavovima (5) i (6) ovog člana ostvaruju se po jednom osnovu – onom koji je povoljniji za kandidata.

Član 12.
(Prednost za izbor)

- (1) Kada prijavljeni kandidati imaju jednak broj bodova, prednost će imati:
- onaj kandidat kojima ima više bodova po osnovu rezultata u učenju,
 - kandidat koji dolazi iz porodice definisane članom 11. stav (5) i (6) ovog Pravilnika.
 - kandidat iz viših razreda odnosno godina studija.

V. PRELAZNE I ZAVRŠNE ODREDBE

Član 13.
(Rodno značenje izraza)

Izrazi koji se koriste u ovom Pravilniku, a koji imaju rodno značenje, bez obzira jesu li korišteni u muškom ili ženskom rodu, obuhvataju na jednak način muški i ženski rod.

Član 14.
(Prestanak važenja)

Danom stupanja na snagu ovog Pravilnika prestaje da važi Pravilnik o kriterijima za dodjelu stipendija učenicima i studentima i nagrađivanju izuzetno nadarenih učenika i studenata („Službene novine Kantona Sarajevo“ broj:36/22 i 42/23).

Član 15
(Stupanje na snagu).

Ovaj Pravilnik stupa na snagu narednog dana od dana objavljivanja u "Službenim novinama Kantona Sarajevo".

Broj:01-04-1244/25
Vogošća, 26.06.2025. godine

PREDSJEDAVAJUĆI
OPĆINSKOG VIJEĆA VOGOŠĆA


Nihad Hadžić